

服將歸而辨之雅量爲何如者比荷環召過雁門余舉酒屬  
公期以乘時建樹相與歔歔泣下公亦不禁慷慨澄清之意  
故其殫竭圖報所靖獻必軍國大計秉鐸畿輔力挽頽靡闡  
揚文教於以光裨聖天子中興之治亦旣沐寵異陟尊優臺  
衡之業翹足可踈遽以勞隕京邸可勝惜哉贈中憲公諸生  
時與柳州先文端公相慕好互期以公輔贈中憲公志卒未  
酬公旣置身通顯說者謂竟先人之未竟固在公乃公亦若  
有未竟也可勝惜哉然公階僅四品歿之日至動九重震惻  
賜兆加籙行被殊恩邑人士感德頌義爲請之御史臺崇祀  
鄉賢食報千秋公亦可以瞑已銘曰厥德如璧道如矢爲古  
循良名直指厥身出處關泰否愠於羣小媚於天子厥用未  
殫胡以死九重致悼兩楹崇祀千秋而下聞者興起